

Comparti storia, combersa y canta cu bo baby ta yud'e den su desaroyo

Fundacion Papiamente ta presenta: Buki Bum 2011

DURANTE 3 diadomingo den november, famianan na Aruba lo ricibi un pakete hopi special y completamente gratis, cu lo yena nan hogar cu e placer di lesamento: Buki Bum 2011.

Den 2009, e proyecto aki a wordo introduci como un piloto, despues di a conduci un encuesta nacional di lesamento, unda e ambiente di lesamento na cas a wordo analisa cu cooperacion di Wit Gele Kruis.

Fundacion Papiamente tabata kier a haya un mihor bista riba e abitonan y e actitud di e mayornan pa cu lesamento, p'asina por introduci un proyecto cu no solamente tin e necesidad pe, pero cu por funciona efectivamente na Aruba.

E proyecto Buki Bum ta afilia n'e campaña di lesamento internacional cu ta carga e nomber di Bookstart - na Hulanda Boekstart - y cu ta un exito na diferente

pais rond di mundo. Desde 2010, Aruba tambe ta forma parti di e famia grandi aki, cu tin como meta pa trece e amor pa buki den tur hogar y for di 0 aña bay ariba. Den november, Fundacion Papiamente lo ofrece e charla nobo 'Crece cu Buki', facilita pa sra. Desiree Correa, conhuntamente cu miembronan di Fundacion Papiamente.

Ta trata aki di un charla cu lo wordo duna pa mayornan cu tin yiu di 0,1,2,3,4 of 5 aña, inscribi na Wit Gele Kruis y cu trece e carchi di AZV di nan yiu. E mayornan aki tin tres oportunidad pa participa na e charla e aña aki, sea di 10 pa 11 di mainta, di 11 pa 12 di mainta, of di 12 pa 1 di merdia.

Buki Bum 2011 lo tuma lugar riba e siguiente diadomingonan: 13 di november na Centro di bario Piedra Plat (veld di Britannia), 20 di november na Centro di Bario Lago Heights y 27 di november

na Centro di Bario Noord.

Durante e charlanan ta bay tin programa special pa mucha y tambe opvang, asina e mayornan no mester kibra cabes cu babysit y tambe nan por participa cu mas tranquilidad. Ta encurasha mayornan pa tuma 1 ora di nan tempo riba un di e diadomingonan aki, paso ta importante pa e mayor (y no bisiña, amiga, juffrouw di scol) di e mucha participa.

E placer di lesamento ta cuminsa na cas, hunto cu bo yiu, disfrutando hunto di buki - esey ta e recompensa mas grandi di henter e proyecto aki.

Aruba ta haya tres buki y un CD nobo nobo regalo: E buki di cantica y e CD "Canta cu Mi", cu ta un coleccion di canticanan pa mucha di e.o. Maybelline Arends-Croes, Digna Laclé-Herrera, studiantenan di APA, compila pa Mirugia de Cuba cu areglo musical di Martin Buitenweg. Tambe

tin e buki di conta "Di 1 te 10" di autora y ilustradora Ariadne Faries, cu ta combina conto di number y storia na un manera unico. "Nano y Nena" di Liliana Braamskamp-Erasmus y Daniëlle Schothorst ta un buki di preñchi, cu ta trece e personahe conoci Nano e enano (Mundo Infantil y e Regalo di Festival di Buki 2007) bek y ta trata e tema di amistad.

Tur esaki y hopi mas ta inclui den e pakete Buki Bum nobo cu mayornan cu yiu chikito ta haya regalo durante e programa Buki Bum 2011.

Fundacion Papiamente cu dia 27 di october a celebra su 7 aña di existencia kier gradici un monton di colaborador, ya cu sin e



sosten di e organisacion y companianan aki, e continuacion di e proyecto Buki Bum no lo tabata posibel. Pa mas informacion y p'e ultimo desaroyonan di e proyecto Buki Bum 2011, por tuma contacto cu Fundacion Papiamente via Facebook, Twitter of bishita e website: www.fundacionpapiamente.com